

## + Vigeli Jacomet-Monn, Sedrun

3.1.1975 / N° 1



(Corr.) Quei che crescha, verdeghescha e madirescha fa buca canera e bahaultscha. Quei che vegn prestau el tgeu ed el zuppa vegn e sa buca vegnir renconuschiu. Empau semegliont eis ei stau cul defunct Vigeli Jacomet-Monn. El ei vivius ina veta tgeua, mo pleina da lavur, oraziun ed activitat el ravugl da sia ordvart preziada famiglia. Sco il proverbi secloma: «Aua tgeua cava riva», aschia ha è sia stenta cavau riva, ina riva nunballuonta e segira.

Vigeli Jacomet ei naschius ils 8 da schaner 1895 en la biala ueliva purila da Surrein/Tujetsch, e quei sco emprem fegl. Sper siu frar Placi passenta el ina affonza da nui. Tochen 26 onns lavura el ensemble — cun ses geniturs e siu frar — el menaschi puril. Encurschend ch'il mudest traffic puril possi in di buca dar paun e fadigia sufficien-tamein a ses geniturs, a siu frar ed ad el, seresolva el da serender anno 1921 a Montreux en in hotel. Leu queta el, ch'el sappi mo raschilar daners en paregl cun la rendita el puresser. Malgrad ch'el vess grondas caschuns da sfarlatar, spargna el quasi mintga rap e tarmetta quels cun ina certa luschezia a casa en in caltschiel tschuf. Mo vess e nuidis e sin expressiv givisch dils geniturs tuorna el suenter in onn a casa. Egl jester ha el buca empriu mo da gudignar, mobein era da calculate. Aschia sedecida el — cun siu frar Placi — da cumprar ina casa a Sedrun ed aunc il grond bein puril dils «Mugglis». Ussa ha el in'existenza, e quei dat curascha ad el da far il pass viaden ella lètg. Cun 31 onn sespresa el cun Mariuschla Monn,

ina dallas pli bialas flurs dalla val. Quella regala ad el 6 affons, tschun buobs ed ina buoba. Tgei legria e ventira! Il sulegl para strusch dad ira da rendiu pli.

Negin human ei denton scaffius mo per la ventira. Quei fatg sto era il bien Vigeli sentir. Suenter 22 onns d'ina lètg ordvart ventireivla e harmonica, sto sia cara consorta prender cumiau 1948 ella vegliadetgna da mo 51 onn da mariu e d'affons. Ina greva frida, ina plaga dolorusa che ha mai pudiu urir cumpleinamein. Per cletg surpren la sulletta feglia Maria, che veva lu mo aunc 17 primaveras, la truscha ed il quita en casa e banduna mai il bab entochen la mort. Quei fatg mereta speciala menziun e renconuschienscha ed astga valer sco exemplar per in e scadin da nus. Vegli il Segner regalar ad ella in di la pagaglia meritada per tutt sacrificis prestai e per tonta carezia fraterna!

Cul discletg splunta enqualgadas agl esch-casa, sche para el nuota da vuler calar da rumplanar. Mo quater onns suenter il cumiau dalla consorta e mumma nega 1952 il fegl Gion Andriu el lag da Sarnen, e quei gest avon la matura. Mo era quella sbuntanada vid il cor dil bab porta el cun resignazion cristiana e cun fermezia da herox.

Sper las cruschs ha il Vigeli è viu il bi ch'il Segner ha regalau ad el. La culminazion da sia legria ei bein stada la Messa nuviala da siu fegl Giusep, che quel ha giu la ventira da celebrar ils 12 d'avrel 1964. Mo era ils auters fegls occupeschian oz plazzas respectablas ed ein adina stai la luschezia dil bab.

Il Vigeli ei staus in pur perschuadiu ed incarnau. Sper la truscha dil puresser ha el aunc fatg il marcadont, e quei cun bien success. Tut che deva bugen ad el las brinas venalas, pertgei el era in um gest. Per uffecis publics e per la politica eis el mai s'engaschaus, malgrad ch'ins havess pliras gadas bugen giu surdau ad el in uffeci, pertscharts ch'ins era da siu saun giudezi e da sia vast'ègliada.

Sia devisa ei stada: «Va adina la via grada, da Diu cumandada, e selai buca empalar e tschurventar d'enatzgei auter, lu viagieschas ti segir sin la dretga senda e quei era sche ti stuesses ira tut persuls!»

Ils 4 da decembre 1974 ei il bien Vigeli morts el spital dalla Crusch a Cuera. El ha segiramein buca stuiu temer da far il pass viaden ella perpetnad, pertgei el ha adina luvrau e barhau, purtau tutta tristezia dalla veta cun fermezia e resignazion cristiana, anflau confiert e curascha ell'oraziun e giu quita da bab per sia famiglia. Tals babs lain anavos fastitgs nunsanevels, fastitgs ch'ins duess e stuess imitar. Vegli il Segner regalar a ti la pasch e la legria perpetna!

-i-

olne!